

AKASHVANI AIZAWL
REGIONAL NEWS UNIT

REGIONAL NEWS BULLETIN
(MIDDAY)



EDUCATION REFORMS

Mizoram Education Reforms Committee (MERC) chu an Chairman Education Minister Dr Vanlalhlana hovin Zirtawpni khan an thukhawm.

He tah hian Sawrkar leh Kohhran thawhhona atanga School enkawl dan tur Public Private Partnership (PPP) rawtna pawm ani. Hemi tih hlawhtlin nan hian Pilot Project in School thlan tur zat leh a hmun turte ruahman fel thuai a ni ang. Draft Mizoram Education Service (MEdS) Rules, 2026 (Common Service) chu siam that ngaite siam tha-in pawm phawt a ni a. MERC thutkhawm leh hmasa berah peih fel tum a ni. Zirtirtute sawn kual dan tur duan Transfer and Posting of School Teachers Rules, 2026 pawh hman theih turin ruahmanna kalpui mek a ni a, hun rei lo teah peih fel tum a ni.

Heng bakah hian tunlai Mizoram zirna atana thil pawimawh leh hmasawнна hna thawh tur kawng hrang hrang an sawiho baw k a ni.



LAWNGTLAI SINKING AREA

Lawngtlai-III leh Electric Veng huamchhunga leitlakhniam thinna lai chu nimin khan Lawngtlai Bawrhsap Pu Donny Lalruatsang an a hmunah a en a, khawtlang hruaitu thenkhat te thil awmdan a sawipui.

Bawrhsap lo dawngsawngtute chuan helai lei tlahniam hi kum 1995 atanga intan tawh a nih thute, vawi engemawzat lei tlahniamin a huamchhunga awmten harsatna an tawh thin thute, thuneitu sang lam atang pawhin a theih ang anga hmalakna kalpui thin a nih thu leh, heihian awmzia thuitak a nei thei rih lo ni a an hriat thu te an sawi a, Pu Donny Lalruatsanga chuan leitlahniamin a nghawng, Lawngtlai-III leh Electric Veng khawtlang hruaitute nen inrawnkhawmin, hmalakdan tur

ngaihtuah phawt tul a tih thu a sawi a, Sorkarin a tihtheih ang angte tih a nih theih na'n hmalakna kalpui tul a tih thu a sawi.

Lawngtlai-III leh Electirc Veng huamchhungah hian Lei tlahniam hian chhungkaw 50 dawn a nghawng a, leitlahniam vanga chenna In thiah ngaite pawh kumdangah a awm thin in, kumin ah chuan lei hi a la chet belh lo nia hriat ani, chemai thei dinhmun ah erawh a ding reng ni a hriat a ni.



KOLASIB VISIT

Chief Secretary hna chelh lai lawk mektu Principal Secretary Pu Sudhir Kumar chuan nimin khan Kolasib a tlawh a, district sorkar mi pawimawhte nen an inkawm.

Pu Sudhir Kumar chuan Kolasib a tlawh chhan sawiin, Forest ram inthuah chungchang a theih ang anga chinfel dan ngaihtuahho tura kal ani,ati. Hemi hnu hian chawhma dar 10:30 atangin Special Investigation Team (SIT) hmalaknate thlirho zui nghal a ni a. Thutkhawmah hian line department-te'n report an pe a, ramngaw humhalh chhunga khaw 22 chu kum 1980 hnu lama din an ni a, khaw 4 chu kum 1980 hma lama din an ni tih tarlan niin, a vaiin khaw 26 a ni. Village Council 35 atanga report thehluh a la nih loh thu tarlan a ni bawk.

Ground survey kalpui dan tur pawh sawiho a ni a. District thuneitu lamin surveyor an dil belh mek thute, fur lai a nih avangin harsatna thenkhat a awm theih thu tarlan a ni. Kawngpui kama ram humhalh (road-side reserve forest) huam chin tihchian dan tur pawh sawiho a ni a. MIRSAC leh Revenue pass te pawh department lamin geo-tagging an tih tawh thu tarlan a ni a. Hei hi hmang tangkaiin khaw palite dinhmun hi chinfel hmasak tura rel a ni. Pu Sudhir Kumar chuan mapping felfai tak siam a, ramri (demarcation) chiang taka kham turin a chah a. Forest Department pawh an reserved forest huam chhungah felfai taka ramri kham a, map uluk taka siam turin a chah bawk a ni.

Kolasib District huam chhunga hmasawnna ruhrel hrang hrang thawh mekte thlirho a ni bawk a. He hunah hian department hrang hrang hna kalpui mekte leh an hmachhawp report ngaihthlak a ni a. National Highway laihzauh leh siamthat meka harsatna awmte leh hmalak chhunzawm zel dan turte sawiho a ni bawk.

Inkawm zawh hian Pu Sudhir Kumar chuan kawngpui thlur li (4 Lane) laih mek a endik a. Kolasib District Civil Hospital building thar sak mek pawh tlawhin a enfiah a, heng bakah hian Rengtekawna FCI Godown, leh Dihmuntlanga Solid Waste Management Centre pawh a tlawh bawk a ni. Pu Sudhir Kumar hi Revenue Secretary Pu Vanlalmawia, Conservator of Forests (planning) Pu Agni Mitra, Kolasib district bawrhsap Pu H. Dolianbuaia, Additional DC leh CALA ni bawk Pi B Malsawmtluangi leh NHIDCL-a executive director Adelbert Susungi leh official dang ten an tawiawm a ni.



KHAWZAWL DQAC

Khawzawl District Quality Assurance Committee (DQAC) chu a vawi khatna atan Addl. Deputy Commissioner Pu K. Zorammuana kaihhruaiin DC Conference Hall, Khawzawlah an thukhawm.

DQAC hian Khawzawl District hnuaia public health facilities awm te- District Hospital, Community Health Centre (CHC), Primary Health Centre (PHC) leh Health & Wellness Centre (H&WC) ten National Quality Assurance Standards (NQAS) an phak ve theih na'n leh State leh National level a Certification an neih theih na'n Committee hi Quarter tinah vawi khat an thu khawm dawn a ni. Khawzawl District Chief Medical Officer (CMO) leh DQAC Convener ni bawk Dr. Shahnaz M. Zothanzami chuan member kalkhawmte hnenah Khawzawl District hnuaia public health facility awmte NQAS-a an dinhmun a tarlang ani.

